

# La taglia per interpresas tschessa

Cun 73 cunter 42 vuschs è il cussegl grond suandà la proposta da la regenza

■ (anr/ac) La cusseglia governativa Barbara Janom Steiner ha persuadi ina maioritad dal cussegl grond da la necessitad da sbassar il pe da taglia a favur da personas giuridicas en il chantun Grischun. Encunter la veglia da la cumissiun da gestiun che aveva proponi da desister ad interim. La terza refurma da la taglia dals interpretidiers che stat en votaziun il favrer 2017 ha dominà la debatta en il cussegl grond il mardi e la mesemna passada davart la proposta da la regenza da sbassar la taglia per personas giuridicas en il chantun Grischun. La confederaziun è sfurzada dad adattar l'imposta per interpresas e holdings al standard internaziunal e propona al suveran svizzer per quel motiv ina refurma. Quella ha consequenzas finanzialas per ils chantuns e las vischnancas. Cifras concretas èn momentan anc speculative. In dals motivs principals per la maioritad da la cumissiun da gestiun da refusar la proposta da la regenza da sbassar a partir da l'onn 2017 il pe da la taglia sin il gugogn da las interpresas da 16,7 sin 16,1 pertschient. Dad in temp fallà per reducir dal taglia ha er il president da la fracziun cristiandemocratica, *Marcus Caduff* (pcd Lumnezia), pledà. El ha fatg valair che sulet paucas interpresas possian propri profitar da la modesta reducziun da la taglia. E quai haja da far pauc cun rinforzar la posiziun dal chantun Grischun en la concorrenza da taglia. El ha rendì attent ad auters chantuns cun in considerablmain pli grond pe da taglia sin gudogn ch'il Grischun. Tenor Caduff paja ina gronda part da las interpresas grischunas nagina taglia sin gudogn ed

ellas na sappian uschia betg profitar dad in pe da taglia pli bass. Il deputà lumnezian ha avertì deputadas e deputads da spetgar la votaziun federala dal favrer 2017 avant che decider davart il pe da taglia per interpresas grischunas.

## «In impurtant signal»

La cusseglia governativa e responsabla per las finanzas chantunals, *Barbara Janom Steiner*, ha renfatschà al president da la fracziun cristiandemocratica en il cussegl grond da nun enconuscher las cifras actualas dals pes da taglia chantunals. Divers chantuns hajan annunzià da sbassar la taglia ed i saja la finala la veglia exprimida pliras giadas dal cussegl grond da restar attractiv en la concorrenza da taglia. La sbassada proponida ha la ministra da finanzas valità per unicamain intermediara. Ella ha annunzià in ulteriur pass en l'avegnir e la finamira da la regenza grischuna da stipular in pe da taglia sin gudogn per las personas giuridicas sin 15 procent per restar attractivs. Independentamain da la decisiun dal suveran svizzer pertutgant la refurma da l'imposta per interpretidiers vegnia il cussegl grond a stuaier sa fatschentar en il futur cun ulteriuras midadas dal pe da taglia e cun adattaziuns da la politica da finanzas. La cusseglia governativa ha valità la proposta actuala da la regenza per modesta e visavi a la situaziun finanziaria actuala per responsabla. Ella ha vinavant appellà da vesair la reducziun sco impurtant signal ed ha rendì attent a l'aut volumen d'investiziun dal chantun che giaja a favur da las regiuns e da las interpresas pitschnas. Nagin sforz d'agir na vesa la mi-



Il cussegl grond è suandà ils arguments da la ministra da finanzas, Barbara Janom Steiner, ed ha decidì a favur dad ina modesta reducziun dal pe da taglia per personas giuridicas.

FOTO O. ITEM

nistra da finanzas en connex cun il pe da taglia per personas naturalas. Là sa chatia il chantun Grischun en ina posiziun fitg attractiva e bleras vischnancas grischunas hajan pudì sbassar il pe da taglia.

## Clera decisiun

Critica vers la proposta da la regenza è era vegnida da la fracziun socialdemo-

cratica che ha fatg attent a las perspectivas finanzialas malsegiras dals onns proxims e che na lubeschian momentan betg da sbassar la taglia. I saja, uschia la deputada *Sandra Locher Benguerel* (ps Cuir), ina proposta a favur da paucs e dals ritgs.

Las fracziuns da la pld, pbd e pps èn suandadas per gronda part la proposta

da la regenza ed han dà suatientscha al giavisch da reducir il pe da taglia sin gudogn da las interpresas cun 73 envers 42 vuschs. A partir da l'onn proxim pon 5000 interpresas grischunas profitar dad ina reducziun da taglia. Profitar pli fitg da la reducziun pon dentant sulet 160 interpresas che nodan gudogns pli gronds.